

四庫全書

史部

欽定四庫全書

史部

唐大詔令集卷

四十一至  
四十四

詳校官編修臣范來宗

編修臣裴謙覆勛

總校官編修臣倉聖脉

校對官學正臣常循

謄錄監生臣甯汝欄

欽定四庫全書

唐大詔令集卷四十

宋 宋敏求 編

諸王

冊妃

冊號王劉妃文

冊齊王韋妃文

冊桂陽郡王楊妃文

冊壽王楊妃文

冊榮王鄭妃文

冊穎王獨孤妃文

冊永王倓莫陳妃文

冊榮王薛妃文

冊濟王崔妃文

冊信王盧妃文

冊陳王韋妃文

冊壽王韋妃文

冊盛王武妃文

缺

冊廣平王崔妃文

冊涼王張妃文

冊蜀王田妃文

冊杞王竇妃文

王妃入道

度壽王妃為女道士勅

收葬王妃

收葬遇害王妃詔

睦親族

宗姓官在同列之上詔

魏王泰上括地志賜帛詔

令宗屬姑叔不得拜子姪制

勉勵宗親詔

選宗子授臺省官及法官京縣官詔

天下三等以上親赴上都制

甄叙皇屬勅

誠勵

責齊王祐詔

誠諸王任刺史別駕文

冊妃

冊號王劉妃文

維貞觀年月日皇帝遣使持節冊命曰於戲惟爾刑部

尚書彭城縣開國公劉威德第二女地胄清華志懷婉  
順訓彰圖史譽聞邦國式遵典禮作儷大藩是用命爾  
為號王妃往欽哉其光膺徽命可不慎歟

冊齊王韋妃文

維貞觀年月日於戲惟爾兼大常卿扶風郡開國男韋  
挺長女地胄高華質性柔順訓彰禮教譽表幽閑作儷  
藩闈實惟朝典是用命爾為齊王妃往欽哉

冊桂陽郡王楊妃文



景雲二年歲次辛亥十月庚寅皇帝若曰於戲咨爾故  
桂陽王妻楊氏誕承華緒光襲懿風性識柔明言容婉  
嫵觀詩著範蹈禮成規往應高禔作嬪英邴謹環珮之  
節珊有其章勵繁藻之誠恭而式叙遣使某持節冊命  
爾為桂陽郡王妃爾其克保彝訓率由茂則以正於家  
無替厥命往欽哉

冊壽王楊妃文

維開元二十三年歲次乙亥十二月壬子朔二十四日

已亥皇帝若曰於戲樹屏崇化必正閭闈紀德協規允  
茲懿哲爾河南府士曹參軍楊玄璪長女公輔之門清  
白流慶誕鍾粹美含章秀出固能徽範夙成柔明自遠  
脩明內湛淑問外昭是以選極名家儷茲藩國式光典  
冊俾叶龜謀今遣使戶部尚書同中書門下李林甫副  
使黃門侍郎陳希烈持節冊爾為壽王妃爾其敬宣婦  
道無忘姆訓率由孝敬永固家邦可不慎歟

冊榮王鄭妃文

維開元二十三年歲次乙亥十二月壬子朔二十七日  
戊寅皇帝若曰於戲作配藩維以正風訓莫不明慎聘  
納聿求儀範咨爾前相州鄴縣令鄭博古第二女素聞  
淑哲自稟幽閑習玩不華圖史成則宜其發祥茂族高  
選當代俾因邦媛之求式叙閭闈之化今遣使侍中裴  
耀卿副使吏部侍郎席豫持節冊爾為榮王妃爾其勉  
茲孝敬誠彼滿盈祗率大猷永膺寵數可不慎歟

冊穎王獨孤妃文

孫逖

維開元二十五年歲次丁丑七月辛巳朔十日辛卯皇帝若曰於戲樹之外屏義在於展親修其內則禮先於擇配咨爾故右驍衛郎將獨孤禮第十二女軒冕之族通姻自久賢明之行淑問攸歸早習組紉之功備詳圖史之學實資女士以儷藩維今遣使工部尚書同中書門下三品牛仙客副使行黃門侍郎陳希烈持節冊爾為潁王妃爾其克慎威儀無忘孝敬欽承國命永茂嬪風可不慎歟

冊永王侯莫陳妃文

維開元二十六年歲次戊寅正月庚午朔十八日丁亥  
皇帝若曰於戲燕翼之樹實屬於維城婚姻之禮必求  
於宜室咨爾右羽林軍長侯莫陳超第五女天資清懿  
性與賢明衣冠之緒克稟於閭德環珮之容詳備於閨  
訓是賴尚柔之質以弘樂善之心宜配藩維用膺典冊  
今遣使金紫光祿大夫兵部尚書兼中書令集賢院學  
士脩國史上柱國晉國公李林甫副使中大夫中書侍

即集賢院學士上柱國徐安貞持節冊爾為永王妃爾其虔恭所職淑慎其儀惟德是脩以承休命可不慎歟

冊榮王薛妃文

維開元二十九年歲次辛巳三月壬午朔十八日巳亥皇帝若曰於戲古人大猷諒在婚禮必資令淑以儷藩維咨爾京兆府新豐縣令薛嶽長女地承華族門傳雅範本幽閑之性為禮教所成循圖覽史蹈和履順固可歸於邦第穆彼嬪風是用命爾為榮王妃今遣兵部尚

書兼侍中牛仙客副使黃門侍郎陳希烈持節禮冊爾其敬佩前規克勤內則式瞻清懿垂美無窮可不慎歟

冊濟王崔妃文

維開元二十九年歲次辛巳五月庚戌朔十四日癸亥皇帝若曰於戲乃媵藩王既開邸第必求士女以昭閭則咨爾故絳州司士參軍崔承寵長女家承茂族代襲清和自幼及長素有柔和之性監循國史復懋幽閑之德徽猷益著淑問可嘉是以膺茲寵章主彼中饋是用

命爾為濟王妃今遣使兵部尚書兼侍中牛仙客副使  
黃門侍郎陳希烈持節冊爾其敬佩箴訓克慎威儀  
輔我維城永崇磐石可不慎歟

冊信王盧妃文

維天寶三年歲次癸未七月戊戌朔二十一日戊午皇  
帝若曰於戲建邦為屏必先於闡教嘉耦曰妃是賴於  
嬪則咨爾前殿中省尚書輦局直長盧季融第三女淑  
德賢明令儀柔順含和自整備詳環珮之容稟訓有方



更出衣冠之族實資女範作配藩維是用命爾為信王妃今遣使尚書右僕射兼右相晉國公李林甫副使銀青光祿大夫行中書侍郎徐安貞持節禮冊爾其肅穆閑闈虔恭禮度克終婦道以正國風可不慎歟

冊陳王韋妃文

維天寶四載歲次乙酉三月己未朔十九日丁丑皇帝若曰於戲咨爾京兆府新豐縣尉韋釜第八女慶承華族禮冠女師欽若保訓踐脩德範遵圖鑒史操尚幽閑

內則嬪儀道彰柔順陰教之美國風攸屬允資邦媛作配藩闈是用命爾為陳王妃今遣使尚書左僕射兼右相吏部尚書集英院學士脩國史晉國公李林甫副使中書舍人兼判刑部侍郎孫逖持節冊爾其率循懿行懋昭令德祇膺典冊可不慎歟

冊壽王韋妃文

維天寶四載歲次乙酉七月丁巳朔二十六日壬辰皇帝若曰於戲古之建封式崇垣翰永言配德必擇幽閑

咨爾左衛勳二府右郎將韋昭訓第三女毓慶高門稟  
柔中間動修法度居玩琴瑟夙聞師氏之學素習公官  
之禮聿求貞懿作儷藩維爰茲輔佐之德以成樂善之  
美是用命爾為壽王妃今遣使光祿大夫行左相兼兵  
部尚書弘文館學士李適之副使金紫光祿大夫行門  
下侍郎集賢院學士兼崇文館大學士陳希烈持節禮  
冊爾其欽承寵數率由令則恭敬婦道可不慎歟

冊廣平王崔妃文

維天寶五載歲次庚戌四月癸未朔十八日戊戌皇帝若  
曰於戲朱郎傳封爰求嘉耦瓊笄作合必擇華宗咨爾太  
子宮門郎崔珣長女胄自軒冕訓承圖記柔閑內正淑問  
外宣既連榮於姻戚且襲吉於龜筮是用命爾為廣平郡  
王妃今遣使光祿大夫行門下侍郎陳希烈持節冊爾  
其虔奉儀則祇膺典禮克昌祚胤永固宗祧可不慎歟

冊涼王張妃文

維天寶九載歲次庚寅四月己未朔十七日乙亥皇帝

若曰於戲內則之禮用穆人倫中饋之義以正家道咨  
爾左衛率府親府左即將羅國公張安仁第二女門承  
軒冕族著清華蕙性柔明蘭儀婉茂早習組紉之藝克  
聞圖史之規儀範聿脩四德斯備虔恭蘋藻之訓式昭  
瓊璜之容作儷英藩允資令淑今遣開府儀同三司行  
尚書左僕射兼右相吏部尚書崇文館大學士監脩國  
史上柱國晉國公林甫副使中大夫行中書舍人權知  
禮部侍郎事上柱國成紀縣開國男李暉持節冊爾為

涼王妃爾其祗膺典禮永綏寵命可不慎歟

冊蜀王田妃文

維建中二年十一月某日皇帝若曰於戲夫茂建親戚以惇族固本明慎聘納以厚別蕃嗣實人倫之始王教之端也朕奉若謨訓詳求淑哲賢必有象鍾慶於今門姻不失親載光於戚里故某官駙馬都尉田擇交第若干女生稟柔惠習知禮則容德純備孝睦洽聞可以叶美好逮輔成樂善之用遣使某持節冊命為蜀王妃於戲

敬之哉備禮以崇其好合起家而居其爵佐非義信不  
固非溫柔不親克恭匪懈則罔攸悔朕言必復可不慎  
歟

冊祀王竇妃文

陸贄

維建中二年十一月某日甲子皇帝使其官某持節冊  
命故某官竇某第若干女為祀王妃曰於戲禮大婚姻  
宗繼嗣本人倫之教詩嘉淑女配君子繫王化之綱蓋  
率人成風由內及外得不採嘉耦以固磐石本宗室而

御家邦詳求唯難歷選滋久時乃擇之得茲舊姻柔懿  
本乎天和禮樂成於家法明章婦順虔奉母儀克成鵲  
巢之功叶宣麟趾之美祇膺嘉禮欽率內教淑慎厥止  
無替有終於戲可不慎歟

王妃入道

度壽王妃為女道士勅

勅聖人用心方悟真宰淑女勤道自昔罕聞壽王瑁妃  
楊氏素以端懿作嬪藩國雖居榮貴每在精脩屬太后



忌辰永懷追福以茲求度雅志難違用敦宏道之風特  
遂由衷之請宜度為女道士

收葬王妃

收葬遇害王妃詔

禍福之源天不可問報應之道理或難憑遂使積善深  
仁併罹荼毒元惡大憝得恣凶殘自古以來未免斯咎  
日者祿山作逆竊據兩都塗炭我生靈傷夷我骨肉於  
禮院門遇害王妃及男子等或閨闈令德婦道柔閑或

藩邸象賢幼年聰慧蒼黃之際陷沒賊中嗟其無辜並  
遭非命興言及此痛悼良深宜令所司即擇日收葬一  
事已上並令官供其失骸骨者亦令招魂神而有感庶  
從改卜之安魂兮來歸將就新塋之吉

元年建  
丑月

### 睦親族

宗姓官在同列之上詔

朕受終揖讓君臨四海普天之下同加惠澤宗緒之情  
義越常品宜有旌揚以明等級諸宗姓官宜在同列之

上未有職任者不在徭役之限每州置宗師一人以相  
管攝別為團伍所司明立條式

武德二年正月

魏王泰上括地志賜物詔

地記之設由來尚矣區外具於山海經內陳於夏載職  
方王制纔舉華夷漢志晉圖各有所紀自茲以後著述  
實繁或學非博通尚多遺闕或地分南北域有長短求  
其折中無聞盡善左武侯大將軍雍州牧相州都督魏  
王泰體業貞固風鑒凝邈學綜策府文冠詞林樂善表

於夙夜好士彰於吐握討論輿地詳延儒雅博採方志  
得之於舊聞旁求故老考之於傳言內殫九服外極八  
荒憲章是程規條有序兼包戎夏今古無遺簡而能周  
博而尤要是以度越前載垂之不朽宜加褒錫以申獎  
勸可賜物一萬匹其書付秘閣

貞觀十六  
年正月

令宗屬姑叔不得拜子姪制

君臣朝序貴賤之禮斯殊兄弟天倫先後之儀亦異聖  
哲之制率由斯道朕臨茲寶極位在崇高負宸向陽雖

受宗枝之敬退朝私謁仍用家人之禮近代以來罕遵  
軌度王及公主曲致私情姑叔之尊拜於子姪違法背  
禮情用惻然自今已後宜從革弊安國相王及太平公  
主更不得輒拜衛王重俊兄弟等及長寧公主姊妹等先  
告宗屬知朕意焉

神龍元年三月

### 勉勵宗親誥

誥朕奉天明命虔受睿圖而皇室子弟未能稱職堂姪  
餘慶永煦紹宗行淹祚洽再從弟燧至謙等不能謹身

奉法而乃輕侮國章擯斥邊隅未為塞責朕憫其愚昧  
屈法伸恩並追赴京令於國子監安置讀書如悔過自  
新克復先訓所司條奏當議其官皇宗親更有左貶嶺  
南及邊遠州非惡逆緣坐等色亦宜准此其有見任別  
駕年齒尚幼未堪理百姓者宜委中書門下及新興郡  
王晉李思訓等簡擇追赴京其祿俸一事已上並要本  
州勾當每季附送入京交付其餘慶等本州祿俸亦准  
此宗親中有才行灼然為衆推挹者按察使其以名聞

朕當擢以不次自今已後有犯賊私違悖禮經者准法  
科處刑茲無捨庶敦睦之情必聞於九族自家刑國允  
洽於羣心宜各勉勵以識朕意

先天二年二月

### 選宗子授臺省官及法官京縣官詔

至公之用本無偏黨唯善所在豈隔親疎四從叔知政  
等咸有才名見推公族秉惟清之操兼致遠之資朕每  
慮同盟不勤於德嘗懸右職以勸其餘先委宗卿精於  
內舉量能考行歷載踰時名數則多列聞蓋寡光膺是

選諒在得人固可擢以清要遷於臺閣將觀志於七子  
異齊名於八人宜各悉行得聞成績書不云乎九族既  
睦平章百姓冀由內而理外必自近而及遠凡今懿戚  
可不慎歟違道慢常無私於王法脩身效節豈薄於他  
人期於率先勵我風俗深宜自勉以副明言

開元三年五月

天下三等已上親赴上都制

常袞

勅堯之敦叙以協萬邦周之宗盟必先同姓莫遠具邇  
懷德惟寧俾強榦於京師思同獎於王室所以洽雍和



之道明補察之義也惟我近屬聯華本枝以文昭武穆  
之宗有錫土建侯之嗣往以艱難之際流寓頗多或僻  
在江山載經时序或雜居州里亦既淹留等威不分無  
以自給儉將逼下卑或踰尊將恐合族展禮之文缺燕  
毛叙齒之儀廢言念及此良深耿耿其三等已上親除  
州縣官及帶職掌應在外者委本道節度觀察量事給  
遞發遣赴上都仍先錄名聞奏

甄叙皇屬勅

勅五代則遷以尊祖禰三族之別以辨親疎故禮曰祖  
遷於上宗易於下六代而親屬竭矣先王所以叙昭穆  
明等夷不可得而變革也應追赴山陵及先在城於西  
宮陪位同五等親宗子等系自本枝分於天派繫之以  
姓而無別約之以禮而有差朕天禍所鍾哀纏罔極嗟  
我公族儼然來斯遠倍七月之期俯就三年之制降殺  
以等存乎典彝名位不同禮亦異數有司定儀將從藉  
屬之條天下為家用廣孝慈之道惇睦九族其在茲乎

應追到及在城同五等親宗子等五品以上各加一階  
六品已下前資常選并散官至簡日稍優與處分未出  
身者量才授文武散官其中有才行學藝為衆所推者  
及嗣羣王嘗經任使灼然著聲績者宜委宗正卿琬漢  
中郡王瑀光祿卿涵錄其名實具狀聞薦自天寶以來  
闕造宗籍宜令宗正等重申舊制昭辨等序即宜勘造  
圖籍宣示中外知朕意焉

誠勵

責齊王祐詔

吾嘗誠汝勿近小人正為此也內乖成德外感非言自  
延伊禍以取覆滅痛哉何愚之甚也為梟為獍忘孝忘  
忠擾亂齊郊誅夷無罪去維城之固就積薪之危壞磐  
石之基為尋戈之釁背禮違義天地所不容棄父無君  
神人所共怒往是吾子今為國讐萬紀存為忠烈死  
不妨義汝則生為賊臣死為逆鬼彼則嘉聲不隕而爾  
惡跡無窮吾聞鄭叔漢戾並為猖獗豈期生子乃自為

之吾所以上慙皇天下愧后土惋歎之甚知復何云

貞觀

十七年  
二月

誠諸王任刺史別駕勅

朕聞司牧兆人有國彝訓敦叙九族前王令典念此宗  
枝久遭沉翳近從班命庶展才能或授外藩或屬內職  
留念訪察屬想風茲罕立嘉聲或聞蠹政當官不存於  
職務處事多陷於偏私禽荒酒德者益多樂善敬賢者  
全少將性之昏昧違此義方豈朕之不明成爾薄德當

從戒慎勉遂悛改如迷而不復自速憊尤已實為之悔  
之無及宜即遞相告示以副朕懷

景雲元年  
十二月

唐大詔令集卷四十

欽定四庫全書

唐大詔令集卷四十一

宋 宋敏求 編

公主

封號

封長寧公主等制

封常芬公主等制

封唐昌公主等制

封高都公主等制

封永寧公主制

封臨晉公主制

封平昌公主制

封高陽公主制

封太華公主制

封壽先公主制

封廣寧公主制



封大長公主制

封永陽長公主制

封真寧公主等制

封永昌公主制

封七女公主制

封十二妹等四人長公主制

封太和長公主制

封定安大長公主制

封延慶公主等制

封萬壽公主等制

封盛唐公主制

冊文

冊信成公主文

冊昌樂公主文

冊高都公主文

冊建平公主文

冊永寧公主文

冊臨晉公主文

冊真陽公主文

冊華陽公主文

冊蓋昌公主文

封號

封長寧公主等制

門下紫宿揚輝爰稱嫔女絳河分彩是曰天孫柔德所

資乃生淑媛長寧公主等孕靈圓魄稟粹方儀載極幽  
閑用光婉順皇基再造景命惟新凡在懿親咸申禮命  
肅雍之地未展徽章宜正此銀宮署茲金榜並開湯沐  
廣宣朝慶可依前件

封長芬公主等制

黃門諸女皆封先王之制第二女等慶聯霄漢體自穠  
華常閱禮於后庭必聞詩於師氏朕撫臨億兆憲章古  
昔俾裂山河之賦用酬湯沐之恩可依前件主者施行

開元三年  
十二月

封唐昌公主等制

邦女下嫁義著周經帝子建封制存漢傳朕訓導諸子  
舊有女師因其婉婉之性進成肅雍之德能鑒圖史頗  
知法度今選婚華族待禮笄年宜加璽綬之典俾開湯  
沐之賦第四女可封唐昌公主第六女可封常山公主  
第八女可封寧親公主各食實封五百戶唐昌公主出  
降張洎俱用八月十九日所司詳備禮物式遵故事

開元

十六年

封高都公主等制

門下肅雍之範以成女德湯沐之賜爰著國章第十二女等生於公宮訓以師氏溫惠之性頗有天姿圖史之學仍聞日就初笄甫及外館將歸宜因待禮之期式備疏封之典可依前件仍各食實封一千戶王者施行

封永寧公主制

門下自昔帝女必建封邑典章不易等數攸存第十七

女幼而閑和長實燕懿引圖史以自鑒用肅雝而成德  
將擇近日言遵下嫁宜承湯沐之賜以備車服之庸可  
封永寧公主食實封一千戶主者施行

開元二十一年

### 封臨晉公主制

門下湯沐建封古今通典豈獨貴於寵數亦兼崇於美  
名第二女性與柔和生知法度率以師氏之訓成其天  
然之質有行之禮將及於笄年備物之恩俾開於井賦  
可封臨晉公主食實封一千戶

開元二十五年十二月

封平昌公主制

門下詩美肅雍遠著於風雅禮有封建久存於簡策第  
十九女尚柔成德克順由表稟於天然自有閑和之性  
訓以師氏備詳圖史之學宜開湯沐俾叶典章可封平  
昌公主食邑一千戶主者施行

封高陽公主制

用嘉成德將及推恩疏封錫號禮典攸在第二十女資  
身淑慎稟訓柔明克備肅雍之儀允彰圖史之德而方



營魯館宜啟沁園俾承寵於中闈復增榮於列賦仍食

實封一千戶

開元二十九年

### 封太華公主制

肅雖稟德邦化所崇湯沐疏封古訓斯在第二十一女  
踐脩間則素承阿保之嚴砥礪嬪儀率由圖史之範璵  
珎既佩柔愿無違蕙問充昭常華自著肇施綵級將具  
禮於輜駟載錫粉田俾申榮於井賦可封太華公主食

實封一千戶

天寶四載

欽定四庫全書

封壽光公主制

肅雍之德教始閨闈湯沐之封榮分爵土第二十二女

二十三女誕膺

闕

發令姿頗

闕

沐宮公之訓遵師氏之

則顧史瞻圖日將月就華宗叶慶方從下嫁之儀盛典

申榮式備開封之制二十二女可封壽光公主二十三

女可封樂成公主仍各食實封一千戶

天寶  
五載

封廣寧公主制

睦親之序必備恩榮加命之貴是存優寵順成公主誕

姿中掖習訓公宮惠心有孚淑問斯著夙蘊柔閑之操  
克彰婉婉之規式閑湯沐雖已申於築館爰擇井田俾  
有光於改邑可封廣寧公主依前實封一千戶

天寶八年

### 封大長公主制

門下周室展親繫車服之等漢氏右戚崇湯沐之封永  
惟加恩必遵舊典第九妹碧渚開祥絳河疏彩成齋莊  
之惠問有明婉之芳徽訓自九重備茲四戒雖肅雍之  
詠彤管既彰而穰李之賜粉田猶闕空承金屋之慶式

昭銀榜之寵可封大長公主

封永陽長公主制

皇第十妹可永陽長公主

第十一妹可晉寧長公主

第十三妹可文安長公主

皇女懷陽郡主可漢陽公主

咸寧郡主可晉安公主

信安郡主可東陽公主

清源郡主可陽安公主

武陵郡主可西河公主

晉康郡主可襄陽公主

第十八女可潯陽公主

第二十一女可臨汝公主

第二十二女可思平公主

第二十三女可邠陽公主

門下慶陽之澤允洽於家邦肅雍之德宜正其封邑第

十六女等皆夙稟柔明幼聞懿範傳圖史之訓行表中  
闡奉蘋蘩之則義昭外館朕嗣膺丕業爰賁寵章宜申  
湯沐之封以彰車服之等丕承懿號允副恩榮可依前

件貞元  
二年

封真寧公主等制

門下第二女等皆以柔懿備聞夙訓知中闈內則之義  
稟傳姆女史之規禮有待年恩從廣愛徵於舊典俾洽  
疏封式分湯沐之榮庶成肅雍之德弘我慶澤被於家

邦可依前件

元和元年  
八月五日

封永昌公主制

門下普寧公主天泉滋德崇蘭發彩纂組之華每工於  
經目保阿之訓深得於稚年容禮必叶言行無間從容  
珩璜之韻婉婉柔嘉之儀而封疏舊邦禮宜改避是擇  
美邑再用申恩可封永昌公主主者施行

封七女公主制

門下長女等抱子弄孫之榮貴賤之大情也朕以四海

奉皇太后于南宮問安之時諸女侍側螽斯之慶上慰  
慈顏鴈鳩之仁內懷均養雖穠華可尚出閣未期而湯  
沐先施分封有據宜加美號以表令儀

封十二妹等四人長公主制

白居易

勅古者帝子下嫁必使王公主焉近代或有未笄年而  
賜湯沐者亦加公主之號以寵重之第十二妹等先帝  
之子也比朕之子宜加等焉故當幼年各封善地咸命  
為長公主未及墮降先開邑封所以慰太后慈念之心



表先帝肅雍之訓亦欲使吾孝理之道敦睦之風自骨肉間以及天下可依前件

封太和長公主制

勅公主之封號也或以善地或以嘉名立愛展親茲惟舊典第四妹端明成性和順稟教靜無違禮故組紉有常訓動必中節故環珮有常聲歲茂穠華日新淑問乃眷肅雍之德俾開湯沐之封可依前件

長慶元年三月

封定安大長公主制

門下我國家制取戎夷推崇恩義示之以大信重之以  
和親所以殫聲教於殊鄰割骨肉之深愛累聖弘略載  
於國章太和公主擢秀天潢聯華宸極智惟周物識可  
洞微乃者回鶻輸誠願求相好穆宗皇帝義難違拒且  
務懷柔以鳳樓和淑之姿降龍庭桀驁之俗一朝辭闕  
二紀於茲常興去國之悲已絕還鄉之望今可汗自竊  
名號來依塞垣朕以渥澤久濡飄零可憫齋以粟帛喻  
之旋歸曾無感激之心益肆貪婪之性遂得忠義同力

將帥協謀未揚金鼓之音已潰犬羊之衆遽收貴主出  
彼穹廬上以慰太后之深慈下以攄兆人之積憤將修  
慶觀坐雪幽寃名節自全歎尚何極笳簫淒悲休傳朔  
漠之聲環珮鏗鏘再齒平陽之列是用易其舊邑錫以  
嘉名增沁園湯沐之封釋邊地風沙之恩舉茲典禮用  
表忠勤祗服寵榮永光簡冊可封定安大長公主

會昌三年

二月二  
十五日

### 封延慶公主等制

門下車服之制載美周詩湯沐

闕

等並稟慶絳河流芳彤管穠華懿淑

雅志靜專柔順之心叶於禮度肅雍之道慶於言容宜  
錫粉田之榮用昭銀榜之貴可依前件

會昌二年  
十月十日

封萬壽公主制

長女可封萬壽公主

第二女可封永福公主

第三女可封西華公主

第四女可封廣德公主

第五女可封和義公主

第六女可封饒安公主

門下諸女之封始資漢制疏邑之典今為國章長女等  
坤道稟柔條風育德莊敬柔順受粹氣於靈源言容法  
度昭穆徽於內則祥降北渚教襲南薰克成天和更承  
姆訓雖年方韶齒而體備肅雍用洽私寵俾開井賦可

依前件

會昌六年五  
月二十三日

封盛唐公主制

門下展親外館則必待年廣愛中闈宜光啟邑第六女  
祥開銀漢秀發金枝孝敬生知柔閑夙稟克奉姆師之  
訓每遵詩禮之文法度自持穠華益茂爰申彝典載錫  
嘉名俾承湯沐之封式示邦家之慶可封盛唐公主備  
禮冊命

冊文

冊信成公主文

維開元二十五年歲次丁丑八月癸卯朔十五日丁巳  
皇帝若曰於戲易著于歸詩稱下嫁所以正風化厚人  
倫也洛爾信成公主淑慎由來柔明形外訓以師氏頗  
詳環珮之儀脩其婦功更習絃絃之藝日徵先近年及  
有行宜錫徽章俾膺茂典今遣使金紫光祿大夫兵部  
尚書兼中書令集賢院學士脩國史上柱國晉國公李  
林甫副使中大夫守中書侍郎集賢院學士徐安貞持  
節禮冊爾其光昭閭德弘長國風無怠厥心永綏介福

可不慎歟

冊昌樂公主文

維開元二十五年歲次丁丑八月癸卯朔二十九日辛未皇帝若曰於戲好合之禮以正人倫肅雍之德用成婦道洛爾昌樂公主生知法度性與和柔亟聞彤管之言頗識采蘋之事素以為絢既閑於內則梅有其實式遵於下嫁宜膺冊書之命以備車服之榮今遣銀青光祿大夫工部尚書牛仙客副使黃門侍郎陳希烈持節



禮冊爾其欽崇四教承順六姻式是大邦受茲明命可不慎歟

冊高都公主文

維開元二十五年歲次丁丑九月十一日皇帝若曰於戲古之聖人垂訓作則必正內外之位以明婚姻之禮洛爾高都公主生於公宮自稟幽閒之性教以師氏更有徽柔之則能循法度克慎言容魯館于歸沁園將啟宜膺冊命俾叶典章今遣使工部尚書牛仙客副使黃

門侍郎陳希烈持節禮冊爾其自下於心增脩厥德式  
瞻清懿永固恩榮可不慎歟

冊建平公主文

維開元二十五年歲次丁丑九月十一日皇帝若曰於  
戲脩五禮者必本於天秩合二姓者將厚於人倫咨爾  
建平公主秉質尚柔因心克順默識閭帷之教明徵圖  
史之言黼藻四德笙簧六行河洲在詠將叶於好逮湯  
沐疏封式昭於備禮今遣使兵部尚書李林甫副使中

書侍郎徐安貞持節禮冊爾其受茲光寵慎乃威儀永保無疆之休且為將來之範可不慎歟

冊永寧公主文

維開元二十六年歲次戊寅八月丁酉朔二十二日戊午皇帝若曰於戲人倫式教以正國風女子有行將成婦道咨爾永寧公主自幼及長終溫且惠引圖書為鏡鑒用柔和為粉澤許嫁而笄既遵於典禮備物之冊宜承於寵命令遣使金紫光祿大夫兵部尚書兼中書令

集賢院學士修國史上柱國晉國公李林甫副使中大  
夫守中書侍郎集賢院學士上柱國徐安貞持節禮冊  
爾其謙恭自下淑慎為先無忝公宮之教永貽邦媛之  
則可不慎歟

冊臨晉公主文

維開元二十六年歲次戊寅閏八月丁卯朔十六日壬  
午皇帝若曰於戲古之帝子下嫁諸侯所以正婚姻之  
懿綱昭肅雍之令德咨爾臨晉公主蹈和成性體順為

心頗協生知之敏更承師氏之訓柔明並著淑慎攸彰  
兼四教而不違勤六行而無斁近日云吉嘉禮有期宜  
穆彛章載光策命令遣侍中幽國公牛仙客副使黃門  
侍郎陳希烈持節禮冊爾其克遵法度用廣徽猷發明  
閭德垂範於後可不慎歟

冊真陽公主文

維開元二十八年歲次庚辰二月戊子朔八日乙未皇  
帝若曰於戲肅雍之德崇婦道也河洲之訓厚人倫也

咨爾真陽公主柔順因心幽閒表質雅著閨闈之則能  
瞻圖史之誠徽章載茂淑範無違禮將及於有行寵宜  
循於賦邑今遣使兵部尚書兼侍中牛仙客副使黃門  
侍郎陳希烈持節冊爾其敬慎威儀無致失墜用膺  
寵命克保宜家可不慎歟

冊華陽公主文

維大厯四年歲次乙酉三月壬申朔五日丙子皇帝若  
曰漢家舊制諸女皆封儀服比於藩王膏腴封其井賦

咨爾第某女承徽自遠誕秀增華仁孝才明夙有天資  
之慶言容法度成於壺教之慈敏達知微周旋中節肅  
雍是憲婉靜流芳雖僅在齒年禮未王於同姓而載揚  
淑問德已冠於成人宜錫典章用䟽國邑是用冊曰某  
公主欽承天命可不慎歟

冊益昌公主文

薛廷珪

維乾寧元年歲次甲寅十月庚寅朔十四日癸卯皇帝  
若曰昔漢頒魯國魏賜常山由鍾愛以分封亦旌賢而

別壤前王茂典歷代成規朕今嗣守不敢失墜咨爾第  
七女蘭茝芳猷肅雍懿範坤順之性體於自然天倪之  
資稟於陰教不明爾德孰慰我心爰稽舊章俾率彝訓  
乃疏湯邑仍錫粉田所以示鳴鳩均養之仁樂螽斯宜  
爾之慶夙興夜寐無忘女史之箴下氣怡聲勉習家人  
之禮女儀婦道可不慎歟

唐大詔令集卷四十一



欽定四庫全書

唐大詔令集卷四十二

宋 宋敏求 編

公主

出降

公主王妃不許舅姑父母答拜詔

詳定公主郡縣主出降儀勅

出降冊文

冊興信公主出降文

冊樂成公主出降文

冊壽光公主出降文

冊平昌公主出降文

冊廣寧公主出降文

冊晉寧公主出降文

冊嘉成公主出降文

加寶封

太平公主加實封制

長寧安樂公主加實封制

宣城公主加實封制

鎮國太平公主加實封制

常芬公主食實封制

和蕃

止和蕃公主入朝制

缺

金城公主降吐蕃制

封永樂公主制

缺

封燕郡公主制

封東光公主制

封和義公主制

封寧國公主制

和蕃冊文

冊金城公主文

冊交河公主文

冊和回紇公主文

冊崇徽公主文

遣黜

郃國大長公主別館安置勅

追封

追封華陽公主制

追封玉虛公主制

追封齊國大長公主制

贈故同昌公主衛國公制

謚議

安興公主謚議文

出降

公主王妃不許舅姑父母答拜詔

天地之尊人倫已極舅姑之敬禮經攸重苟違斯義有  
數彝則如聞公主出降王妃作嬪舅姑父母降禮答拜  
此乃子道攸替婦德不脩何以式序家邦儀型列聞自

今以後可明加禁斷使一依禮法若更有以貴加於所

生者令所司隨事糾聞

顯慶二年二月

詳定公主郡縣主出降儀勅

冠婚之義人倫大經昔唐堯降嬪帝乙歸妹逮於漢氏  
同姓主之爰自近古禮教陵替公主郡主法度僭差姻  
族闕齒冑之儀舅姑有拜下之禮自家刑國有愧古人  
今縣主有行將俟嘉命俾親執棗栗以見舅姑敬遵宗  
婦之儀降就家人之禮事資變革以抑浮華宜令禮儀

使與禮官約古今儀禮詳定公主郡縣主出降覲面之  
儀以聞

出降冊文

冊興信公主出降文

維開元二十九年歲次辛巳閏四月辛巳朔十八日戊  
戌皇帝若曰於戲先王作則女子有行必開湯沐之封  
以成雍肅之美咨爾興信公主自幼及長含和尚柔鑒  
圖史而思齊勤組紉而無斃能遵法度克茂幽閑教於



公宮既昭雅訓歸於外館宜穆彛章今遣使吏部尚書  
兼中書持節徐安貞持節禮冊爾其益自修飾不忘誠  
慎俾昭淑問貽永無窮可不慎歟

冊樂成公主出降文

維天寶五載歲次庚戌七月辛亥朔二十三日壬申皇  
帝若曰於戲三綱以正王化是先二姓之合人倫式叙  
下嫁之禮厥惟舊章咨爾樂成公主毓質柔明稟性閑  
婉幼彰惠問長有令儀教於公宮頗閱於圖史導以內

則克勤於纂組瓊笄既襲紺綬斯榮方諧卜鳳之期式  
叶從人之典今遣特進行尚書右僕射兼左相吏部尚  
書晉國公林甫持節冊命往欽哉爾其祇率外禮虔恭  
中饋順而不違謙而不滿日新其德以正家人可不慎  
歟

冊壽光公主出降文

維天寶五載歲次庚戌八月辛巳朔十三日癸巳皇帝  
若曰於戲家人以正易著乎詞女子有行詩載其義王

化之本婦道攸先咨爾壽光公主敏質柔閑資性純懿  
芳衿內穆淑問外宣能遵阿保之訓頗聞詩書之旨習  
茲彤史既稟教於中闈襲以瓊笄斯待年於外館龜謀  
允叶鸞節方舒率是舊章式茲典禮今遣使光祿大夫  
行門下侍郎同中書門下平章事陳希烈副使中大夫  
給事中王壽持節禮冊往欽哉爾其祗勤敬德斧藻令  
儀履順居中以永終譽可不慎歟

冊平昌公主出降文

維天寶五載歲次庚戌十二月戊申朔九日丙辰皇帝  
若曰於戲婚姻之序人倫為大家道以正王化乃貞咨  
爾平昌公主性質閑婉襟靈敏悟柔順外徽和惠內融  
公宮道訓備聞勤儉之則女史箴規克慎言容之範頗  
聞圖象既習紘紃方脩中饋之儀式從下嫁之禮罰車  
遵路蚤度在庭歸爾好仇申旌寵典今遣使特進行尚  
書左僕射右相吏部尚書晉國公李林甫副使朝敬大  
夫守中書舍人李暉持節禮冊往欽哉爾其虔脩令德

祇服厥訓循於法度宜爾室家可不慎歟

冊廣寧公主出降文

維天寶九載歲次庚寅四月己未朔二十六日甲申皇帝若曰於戲本於王化正乃人倫始於國風成於婦道咨爾廣寧公主柔儀明婉淑性和惠端閑外肅敏悟內昭稟訓公宮法度彰於懿範受教女郎言容順於閭德頗聞圖史能習組紉方遵下嫁之儀式備親迎之禮三星迨吉百兩于歸申以徽章弘茲寵命今遣使特進行

左相兼兵部尚書崇玄館大學士集賢院弘文館大學士上柱國潁川郡開國公陳希烈副使正議大夫給事中權知刑部侍郎上柱國滑源縣開國男李麟持節禮冊往欽哉爾其祇膺典禮勤脩內則宜爾家室叶於雍肅可不慎歟

冊晉寧公主出降文

常袞

維大曆七年歲次壬子七月庚辰朔十六日乙未皇帝若曰於戲春秋之義下嫁之禮主於同姓送以上卿克

明大倫協用彝典咨爾晉寧公主孝敬閑婉朗然夙成  
法度言容資於內訓詞禮是則令淑增華封魯之榮已  
開湯沐適齊之美史洽肅雍寵爾有行舉茲成命今遣  
使金紫光祿大夫門下侍郎同中書門下平章兼弘文  
館大學士知館事克太清宮使上柱國齊國公王晉持  
節禮冊爾其奉公宮之教和邦族之姻載揚夙徽永作  
來範敬承明誠可不慎歟

冊嘉成公主出降文

維貞元二年歲次乙丑六月甲子朔十二日亥皇帝若曰  
王者以義睦宗親以禮敦風化義之深實先於友愛禮  
之重莫大於婚姻故春秋書築館之儀易象著歸妹之  
吉予用是祇考明義率由舊章咨爾嘉成公主特稟生  
知秉承光訓行必中則意不違仁柔謙孝友惠和純懿  
嘉乃全德時惟成人疏邑啟封命為公主徽章備物禮  
實宜之今遣使金紫光祿大夫檢校司徒同中書門下  
平章事沂國公勉持節冊命於戲戒哉下嫁諸侯諒為



古制肅雍之德見美詩人和可以克家敬可以行已奉  
若茲道永孚於休懋昭令問無替朕命光膺盛禮可不  
慎歟

加實封

太平公主加實封制

鸞臺睦親之序誠有節而難踰褒善之方諒無私而可  
洽太平公主延祥紫極稟慶彤闈月至漸宮下金娥而  
毓照星分漢渚迴寶婺以凝姿踐素依仁更緝柔閑之

範聞詩踐禮還裝婉順之容毓悟發於天機聰敏協於神授所以特鍾先愛偏荷聖慈動輒承恩言必中旨故秦臺下鳳禮越於常儀魯館乘龍榮該於美選自蜃軒既路蛩巖閱寢途遙千里時亢九炎攀從莫由荒號孰寄公主親承委屬代申悲苦涉履山川念徒行而彌切奠奉明夕哀獨薦而逾勤宮務畢脩闈容胥備中外咸允情理兼極朕以某雖有殊效蓋是恒途而几典樞機固申奏請豈可以私親之嫌累夫公道之平分宜增湯

沐之榮以表肅雍之譽可加實封

長寧安樂公主加實封制

門下長寧公主安樂公主等金波毓彩寶婺凝輝蘊詩  
禮於心臺暢柔明於性府肅雍成德婉婉居懷非弄玉  
之能方豈修瑤之是美特荷掌中之愛尤鍾膝下之慈  
宜錫寵榮再崇湯沐可更加食實封一千戶通前滿二  
千戶

宣城公主加實封制

門下敦族睦親事光彝典分形共氣理冠恒倫宣城公  
主慶聯霄極榮開邸館柔和應圖婉順為範義歸從子  
榮匪求即國難初平朝獎思及宜加并賦式崇優寵可  
加實封五百戶

鎮國太平公主加實封制

門下功定宗社者可以高邁等夷事超繡簡者故能永  
昭徽烈鎮國太平公主若華分景穠李疏芳以同氣之  
親鍾先朝之愛忠孝行已仁明絕倫才無不周識無不

綜頃夷國難爰戴朕躬忠義動天懇誠貫日氛祲已廓  
每聽鳴謙之詞井田未優復聞辭貴之請朕方至公被  
物豈以小節從人宜增土宇更傳帶礪可加實封一千  
戶

常芬公主食實封制

常芬公主宮成訓歸妹有儀錫號疏封雖以洽於前  
典推恩食邑猶未崇於後命宜書沐賦之榮式昭築館  
之義可食實封五百戶用今年九月丁巳出降張去盈

所司詳備禮物式遵故事

開元十年

和蕃

金城公主降吐蕃制

聖人布化用百姓為心王者秉仁以八荒無外故能光  
宅遐邇財成品物由是隆周理歷恢柔遠之圖強漢乘  
時建和親之義斯蓋御寓長策理邦茂範朕受命上靈  
克纂洪業總三才而統極混六合以為家聲教所覃建木  
棘林之外提封爰亘弱水流沙之表悠然至道高詠薰

風載戢干戈大張禮樂庶幾前列克致和平睠彼吐蕃  
僻在西服皇運之始早申朝貢太宗文武聖皇帝德侔  
覆載情深億兆思偃兵甲遂通姻好數十年間一方清  
靜自文成公主化往其國因多變革我之邊隅亟興師  
旅彼之蕃落頗聞彫弊頃者贊普及祖母可敦酋長等  
屢披誠款積有歲時思托舊親請崇新好金城公主朕  
之少女長自宮闈言適遠方豈不鍾念但朕為人父母  
志恤黎元始允誠祈更敦和好則邊土寧晏兵役休息

遂割深恩為國大計宜築外館聿膺嘉禮降彼吐蕃贊  
普即以今月二十七日朕親自送於郊外

景龍四年正月

### 封燕郡公主制

漢圖既采蕃國是親公主嫁烏孫之王良家聘氈裘之  
長欽若前志抑有舊章餘姚縣主長女慕容氏柔懿為  
德幽閑在性蘭儀載美蕙問增芳公宮之教夙成師氏  
之謀可則今林胡請屬析律無外雖柔遠之仁已私於  
上畧而由內之德亦質於元女宜光茲寵命睦此蕃服



俾遵下嫁之禮以叶大邦之好可封為燕郡公主出降

與松漠郡王李鬱于

開元十年

### 封東光公主制

炎漢盛禮蕃國是和烏孫降公主之親單于聘良家之  
子永惟前史率由舊章故成安公主女韋氏六行克昭  
四德聿備漸公宮之訓承內則之誠屬林胡請命扞塞  
無虞柔遠之恩已歸於上畧采楚之慶載睦於和親宜  
正湯沐之封式崇下嫁之禮可封為東光公主出降饒

樂郡王魯蘓

封和義公主制

呼韓來享位列侯王烏孫入和義通姻好懷柔之道古今攸同寧遠國奉化王驃騎大將軍阿悉爛達于志慕朝化誓為邊扞漸聲教而有孚勤職貢而無闕誠深內附禮異殊鄰爰錫嘉偶特申殊渥四從弟前河南府考城縣令參第四女質稟幽閑性惟純懿承姆師之訓導實宗黨之光儀固可以保合戎庭克諧邦選宜膺遠好

以寵名蕃可封和義公主出降寧遠國奉化王

封寧國公主制

朕聞古之聖王臨御天下功懋受賞道無隔於華夷義  
存有孚信必全於終始故能德被寰宇化延殊俗是以  
周稱柔遠克著康濟之圖漢結和親式弘長久之策由  
來尚矣朕祇若元命永惟稽古內申九命勉膺嗣夏之  
期外接百蠻庶廣懷荒之澤頃自允渠作亂宗社阽危  
回紇特表忠誠載懷奉國所以兵踰絕漠力徇中原亟

除青犢之妖實賴烏孫之助而先有情款固求姻好今  
兩京底定百度惟貞奉皇輿而載寧纘鴻業而攸重斯言  
可復厥德難忘爰申降主之禮用答勤王之志且骨肉  
之愛人情所鍾離遠之懷天屬尤切况將適異域寧忘  
軫念但上緣社稷下為黎元遂抑深慈為國大計是用  
築茲外館割自中闈將成萬里之婚冀定四方之業以  
其誠信所立家國攸寧義以制名式崇寵號宜以幼女  
封為寧國公主應緣禮會所司准式其降蕃日仍令堂

弟銀青光祿大夫殿中監郡王瑀充冊命英武威遠毗  
加可汗使以堂姪正議大夫行右司郎中上柱國上邽  
縣公賜紫金魚袋選為副特差重臣開府儀同三司行  
尚書左僕射冀國公裴冕送至界首凡百臣庶宜知朕  
懷乾元元年  
年六月

和蕃冊文

冊金城公主文

沈佺期

景雲二年歲次辛亥闕月甲辰朔二十日癸亥皇帝若曰咨爾金

城公主幼而敏惠性實柔明徽藝日新令容天假先帝  
承皇祖之寶訓繼文成之舊姻割天性之慈徇安人之  
業何蒼生不幸紫宸闕代朕勉及丕業兢守大烈永懷  
同氣注存遺體靖言河湟無忘鑒寐湯沐之數信命之  
勤追平昔而載深於骨肉而加等於戲禮之降殺大繫  
於情情之厚薄抑亦在我今猶予屬愛何異所生然叔  
父繼恩更思敦睦是用命朝散大夫試司賓少卿護軍  
曹國公甘昭充使試詹事丞攝太子贊善大夫沈皓仙

為副持節往冊爾為朕長女依舊封金城公主率由嬪  
則無替爾儀載光本朝俾乂蕃服可不慎歟

冊交河公主文

維開元二十一年歲次庚辰四月丁巳朔十五日辛未  
皇帝若曰於戲大邦為好蕃服維寧豈獨元夫亦資良  
偶咨爾十姓可汗開府儀同三司濛池都護阿史那所  
妻涼國夫人李氏柔懿成性幽閑表儀能脩關雎之德  
克奉蘋蘩之禮自祇率輔佐肅恭言容載茂彤箴允諧

內則是以崇寵蕃扞懷柔遠人將適遐荒更榮封邑是  
用冊爾為交河公主爾其叶化蕃邦竭誠婦道膺茲寵  
命可不慎歟

冊和回統公主文

維大歷二年歲次丁未五月己酉朔十三日辛酉皇帝  
若曰帝乙歸妹表於易象魯侯築館列在春秋咨爾第  
某女雲漢之姿聯華宸極河洲之德著美公宮整玉笄  
於錦車題銀榜於毳幙善脩嬪則載叶蕃情實資輔佐



之功廣我懷柔之道烏孫下嫁已申飾配之儀紅綬增  
榮爰寵疏封之命是用冊曰某公主敬承徽禮可不慎  
歟

冊崇徽公主文

常袞

維大歷四年歲次己酉五月戊辰朔二十四日辛卯皇  
帝若曰於戲魯邦外館有小君之儀漢室和親從闕文  
之號命公主而疏邑以封煥於徽章抑有前範咨爾第  
十女稟秀雲漢增華女宗卓爾洵淑迥然昭異肅雍之

道能中其和縲麗之功自臻於妙不資姆訓動會禮經  
甫及初笄之年眷求和鳳之對用開湯沐方戒油駢我  
有親鄰夙稱雄貴分救災患助平寇虞固可申以婚姻厚  
其寵渥况有誠請爰從歸配是用封曰崇徽公主出降  
回紇可汗冊曰可敦割愛公宮嬪於絕域爾其式是閭  
則以成婦順服茲嘉命可不慎歟

謹點

邠國大長公主別館安置勅

妖妄莫甚於巫蠱罪惡莫逾於姦亂迹涉於此刑其捨  
諸部國大長公主藻質天潢不慎其德行違禮法悉匿  
回邪信妖孽之虛言求厭勝之非福憫其將老之年從  
我議親之典置於別館勿謂無恩其子蕭位不思諫正  
手疏祝詞其弟儒僊及異父兄駙馬都尉裴液相與知  
情陷於不義蜀州別駕蕭鼎商州豐陽令韋惲前彭州  
司馬李萬等謬居清貫輕紊常倫在其門庭多行穢德  
忝列衣冠之緒豈宜履舄之交

宜令京

北府決重杖四十配流賀州裴掖綿州安置蕭佩儒偲  
等並配房州安置其蕭位等並馳驛發遣

貞元三年

追封

追封華陽公主制

周漢之儀湯沐之制車服次於王后容衛榮於戚藩其  
淑德竟謝於茂年成禮未主於同姓則加其寵榮舉於  
前典是以東漢追平原之封西晉崇宸獻之命故第五  
公主天縱柔和性成聰敏爰自辨識秀於人倫仁義切

於哀誠怡順適於師訓先意承旨不待名言省醴適饌  
每加豐潔送迎匪憚於寒暑溫扇無待於傍人甘去繁  
奢樂聞禮教將有詞情必候溫顏或遇勞神輒形焦色  
周旋六行諷詠七篇霽威怒以拯危承歡愉而進善常  
求患下聚請求賢而髻鬣之辰清羸多疾沉綿衽席彌  
歷紀年針艾嬰身藥餌在口異在殊常之命實有兼愛  
之慈與之名都假以榮號築館之盛乃從受邑之期方遇優  
典未彰幼齡已謝追懷既往痛悼滋深方展禮於舊章

稍中哀於備物叶予素志厚爾飾終可追封華陽公主

大歷九  
月四月

追封玉虛公主制

勅因親之愛存則均慈緣情之禮歿而逾厚故某

闕公主

敏識冲和韶姿婉秀純孝之性自合於天經柔順之心  
夙成於闕則動唯中禮言必知徽承夙烈之元風悟道  
家之真錄方開魯館甫往有行未啟漢封遽幽長往念  
其早夭倍軫哀情用追湯沐之榮載錫靈仙之號可追

封玉虛公主

追封齊國大長公主制

勅荆南節度使觀察處置等銀青光祿大夫檢校兵部尚書兼江陵尹御史大夫上柱國沂水縣開國子食邑五百戶王潛母贈晉國大長公主於朕祖宗之姊妹也始以肅雍之德下教於公侯淑問怡聲禮無違者撫其愛子有過嚴君不因恩澤以求卽每教忠貞以事主使勤富貴戒勵廉能鬱為勲臣實資聖善徽猷盡在典禮

宜加尚狹平陽之封式廣營丘之地克宣朕命用慰朕  
心可贈齊國大長公主

贈同昌公主衛國公主制

沈攸

門下死生有命雖著於格言天橫難明豈由於定數每  
念肅雍之德載纏悲愴之懷疏土易名申彝典故同  
昌公主生知孝敬天錫聰明桃李凝華芝蘭蘊秀克奉  
公宮之訓寧煩女史之箴洎結慶秦樓傳芳魯館蘋繁  
潔淨環珮鏗鏘不矜帝子之尊盡執家人之禮謂乎積



善享彼修齡驚電逝以霜摧致珠沉而玉折粉田蕪沒  
金勝淒涼荒沁水之林園寢平陽之簫鼓哀情靡極縹  
禮宜加啟衛國之山河擇周公之謚號式崇徽教用慰  
營魂可贈衛國公主兼賜謚曰文懿仍令所司擇日冊  
命主者施行

謚議

安興公主謚議文

沈佺期

議曰臣聞表終受名素存考行王姬內範貽教潛流徽

問積中之在下公主降靈宸極昇慶高祺貞惠日嚴  
柔明天縱英姿灼乎髻鬋夙智形於襁褓孝為德本資  
色以養親禮即敬輿履謙而軌物生成天族長自華宮  
珠玉滿堂不忘於澣濯歌鍾成列載玩於圖史恭聞懿  
風庶覩嬪則未延百兩奄邁重泉皇帝正位瑤圖追榮  
金榜穠華大秀軫餘悼於生前彤管凝芬追令名於沒  
後謹按周禮謚法容儀恭美曰昭慈仁短折曰懷請謚  
曰昭懷公主謹議

次定回車六言

唐大詔令集

三

唐大詔令集卷四十二

欽定四庫全書

唐大詔令集卷四十三

宋 宋敏求 編

郡縣主

縣主出嫁稱適詔

新都郡主適楊泚制

安樂郡主適楊守文制

新都郡主適盧咸制

義安郡主適裴巽制

封安定郡主制

封新平郡主制

東光縣主事跡入國史詔

封壽昌縣主制

壽昌縣主適崔珍制

封仙源縣主制

封永年縣主制

封華亭縣主制

封安吉縣主制

加襄樂縣主等實封制

封恩王等女為縣主制

郡縣主

縣主出嫁稱適詔

古稱釐降惟屬王姬比聞縣主適人皆云出降娶王女者亦云尚主濫假名器甚乖禮經其縣主出嫁宜稱適

取王女者稱娶仍改令文

顯慶二年九月

新都郡主適楊泚詔

鸞臺皇太子長女新都郡主資靈玉裕比價瑤臺發艷  
天庭仰儷星辰之像徽諸禁內夙稟河洲之德惠心明  
婉柔範端莊始踰待年之期甫及有行之歲通事舍人  
楊泚門擅槐庭地連姻戚箕裘克降才質蕪茂可以膺  
合姓之典奉御輪之躅標梅興詠方邀六禮之歡在楚  
言歸宜迨三星之夕郡主可出適楊泚



安樂郡主適楊守文制

鸞臺皇太子第八女安樂郡主承規銀榜毓彩銅樓寶  
婺連暉瓊娥比艷貞明發於閭訓窈窕齊於國風固已  
儀範不僭柔閑有裕蘋蘩入薦既成四教之德桃李方  
春宜用三周之禮可出適符節即弘農楊承烈男守文

新都郡主適盧咸制

鸞臺皇太子第二女新都郡主相王長女壽昌縣主第  
二女安興縣主等並毓靈天漢稟訓皇門惠性早成芳

規克茂粉澤四教針縷七篇笄年在時令月有典宜穆  
三從之禮式光百兩之迓新都郡主可出適左衛翊盧  
成壽昌縣主可出適太子右奉御楊尚一安興縣主可  
出適梁王府參軍薛琳所司准式

義安郡主適裴巽制

鸞臺皇太子第二女義安郡主重月降輝發春揚彩四  
德淳茂六行恭脩歲在結纓時方納幣均州司倉裴巽  
門曾清顯風範昭明既諧委雁之祥宜縟盤螭之禮郡

主可出適異仍以今月十四日成禮所司准式

封安定郡主制

孫逖

門下故惠宣太子第三十女肅雍成性柔婉為容稟訓  
女師克嫻嬪則爰占近日用叶初笄申錫美名受封良  
邑可封安定郡主主者施行

封新平郡主制

孫逖

門下惠宣太子第三十一女柔姿婉訓淑德閑和早習  
組紉備詳圖史移天有禮撰日于歸宜增列郡之封允

叶睦親之計可封新平郡主主者施行

東光縣主事跡編入國史詔

故紀王女東光縣主忠性純孝雅操貞烈感興運之方  
啟痛亡靈之不追休戚是同悲喜交集發言鯁塞因致  
殂謝間之傷惋震於予懷忠孝之情深可嘉尚宜命史

官編入國史

神龍元年三月

封壽昌縣主制

鸞臺相王旦長女第三女第四女等毓靈河漢稟訓天

人蕙問清淑蘭儀婉順徽章所披抑有坦之封式開湯  
沐之邑長女可封壽昌縣主第二女可封淮揚縣主第  
四女可封壽光縣主

壽昌縣主適崔珍制

鸞臺相王長女壽昌縣主第五女仙源縣主並稟靈天  
漢漸訓王門質耀桃李性分蘭蕙帝孫將降甫及笄年  
國人所承允歸時望清廟齋卽崔珍太子左奉御薛伯  
陽並地襲衣冠躬履名教風猷美茂才藝紛綸飛鳳之

占既合其吉乘龍之背宜膺雙舉壽昌縣主可出適珍  
仙源縣主可出適伯陽仍令所司准式例

封仙源縣主制

鸞臺相王第五女資靈桂魄稟訓蘭宮六行昭宣四德  
淳備天桃穠李既挺淑令之姿紅綬青緹宜開湯沐之  
邑可封仙源縣主

封永年縣主制

鸞臺某王某第幾女毓芳桂苑發艷淑庭繡衽初笄已

觀於婉淑瑤筐載弄更表於柔閑韶容將寶婺分暉惠  
質與瓊蛾比秀承規蹈禮既漸訓於河洲延賓推恩宜  
加榮於湯沐可封永年縣主

封華亭縣主制

黃門司空兼虢州刺史邠王守禮第二女王門誕秀師  
氏尚柔婉嫵凝芳閑和順則佇儀膏族俾錫脂田可封

華亭縣主

開元二年  
九月七日

封安吉縣主制

蘓頰

黃門宋王長女流芳桂邸稟訓梧宮體自閑和成其婉  
婉玉笄始茂金燧方嚴爰寵錫於脂粉俾開榮於湯沐  
可封安吉縣主主者施行

開元二年十二月二十八日

加襄樂縣主等實封勅

孫逖

勅故惠宣太子女襄樂縣主等德稟賢王名高淑女資  
其婉順邁此偏孤念遠之德惟恩是屬宜受賜於湯沐  
俾承榮於敦叙可各賜實封一百戶

封恩王等女為縣主制



王者教化本於婚姻由親以及踈自內而形外故詩稱  
好合所以成子姓也禮有待年明其必及時也恭惟累  
聖之後子孫衆多教於公宮已知婦順而從人之義重  
擇配之才難以茲兢慎久曠嘉禮言念及此惕然興懷  
思弘厚恩用叶敦叙恩王等女六人並封縣主仍委中  
書門下與宗正卿及吏部尚書侍郎計會於諸親之內  
及常選之中精求人門副我誠意

元和六年  
十二月

唐大詔令集卷四十三

欽定四庫全書

唐大詔令集卷四十四

宋  
宋敏求  
編

大臣

宰相

命相一

裴寂蕭瑀左右僕射制

裴寂司空制

長孫無忌右僕射制

房玄齡杜如晦左右僕射制

李靖右僕射制

長孫無忌司空制

溫彥博右僕射制

高士廉右僕射制

長孫無忌司徒制

房玄齡司空制

狄仁傑內史制

韋嗣立平章事制

崔日用參知機務制

姚元之同三品制

張說檢校中書制

劉幽求知軍國大事制

劉幽求同三品制

張說中書令制

姚崇兼紫微令制

盧懷慎平章事制

盧懷慎檢校黃門監制

源乾耀平章事制

宋璟兼黃門監蘇頲平章事制

張說同三品制

張說兼中書令制

命相一

裴寂蕭瑀左右僕射制

端揆之職綜理百司任望斯重勲賢攸寄尚書左僕射  
魏國公寂風格淹粹局量弘雅早預經綸元功特著燮  
諧治本茂績以宣中書令宋國公蕭瑀志懷貞確業履  
冲素歷居顯要礪精治術獻納惟允周順有聞宜穆彝  
章允釐庶政寂可尚書左僕射瑀可尚書右僕射

武德六年

四月

裴寂司空制

槐路清肅台階重峻經邦論道燮諧是屬然而表德優  
賢昔王令典庸勲紀績列代通規尚書左僕射魏國公  
寂地胄清華風神閑悟立志溫裕局量弘雅爰自義旗  
早參締構宜契所感實資同德譬茲梁棟有若鹽梅翊  
贊綢繆庶政惟允歷居端揆曩章緝穆元功懋德寵秩  
未臻宜處鼎司膺茲重望可司空

武德九年九月

長孫無忌右僕射制

望隆朝右任重國鈞尚想風徽義惟賢戚吏部尚書齊



國公長孫無忌識量宏遠神情警發道昭措紳才資文武  
搏俎之策電斷風馳干戈所指雲銷露澈機深之理  
彌著忠義之節以彰斯固立德佐時降靈輔闕宜期以  
翼贊授之端揆可尚書右僕射

貞觀元年七月

房玄齡杜如晦左右僕射制

尚書政本端揆任隆自非經國大材莫或斯舉中書令  
兼太子詹事邢國公房玄齡器宇沉邃風度宏遠譽彰  
遐邇道冠簪纓兵部尚書檢校侍中蔡國公杜如晦識

量清舉神彩凝映德宣內外聲溢廟堂朕自克平宇縣  
締構資始叶贊經綸厥功甚茂深謀秘畧動合規矩忠  
義謹言事多啟沃及典司樞要綢繆宸扆開物成務知  
無不為可謂神降英靈天資人傑並宜總司衡軸光闡  
大猷玄齡可尚書左僕射餘如故如晦可尚書右僕射

貞觀三  
年二月

李靖右僕射制

端右望隆寄任尤重實資勲德朝難其選左光祿大夫

行兵部尚書代國公李靖識度宏遠才畧優贍博綜機  
務兼資文武誠著夷險效彰吐納便蕃省闈詳謹有聞  
宜緝彞倫允茲名器可尚書左僕射

貞觀四  
年八月

### 長孫無忌司空制

論道台階寔賴明哲丹青神化寄深燮理自非鹽梅是  
屬棟幹有歸則曠職俟能罔或必備開府儀同三司齊  
國公無忌器宇凝正風度峻遠才包文武地兼賢戚誠  
著草昧之辰業預艱難之始功侔十亂聲高三傑亮采

銓衡庶僚有序儀型端右彛章以穆自任參昴司位班  
槐路撝挹之美形於搢紳翼贊之規章於帷宸宜崇名  
器允副具瞻可司空所司具禮以時冊命

貞觀七年十一月

温彦博右僕射制

文昌治本端副望隆朝綱所屬選衆斯在中書令虞國  
公温彦博體業貞固學藝該明器惟瑚璉材稱棟幹任  
總絲綸職居近密迺心著於帷幄嘉謀表於樽俎寄深  
啟沃義切鹽梅宜升禮闈允茲彛序可尚書右僕射勳封

如故

貞觀十年三月

### 高士廉左僕射制

司會政本執法任隆歷選攸難惟賢是屬特進尚書申  
州刺史上柱國申國公高士廉器宇冲邈機神峻遠材  
稱棟幹望重縉紳地惟姻婭廼誠著於疇昔業預經綸  
嘉庸彰於夷險出總方岳入贊機衡獻替之情譽光八  
舍銓總之美聲洽九荒啟沃是寄鹽梅斯在宜貳端右  
允副式瞻可尚書左僕射特進刺史勲官封並如故

貞觀

十二年

七月

長孫無忌司徒制

古先哲后咸正庶官德優者爵高功多者祿厚是以經  
邦緯國必俟蕭曹之勲燮理陰陽允歸鍾華之望司徒  
趙國公無忌識量弘博風度峻遠地惟親賢材稱梁棟  
締構霸業茂勲著於艱難弼成王道廼心竭於寅亮鹽  
梅是寄丹青攸屬德綜機衡聲猷具舉自升槐鉉歲月  
亟移固以勒美太常書忠甲令者矣宜陟中台式典邦

教可司徒

貞觀十六年七月

### 房玄齡司空制

惟天為大資四序以成功惟王建國候三台以弘化故  
隆漢受命吳鄧飛聲有晉勃興荀何底績開府儀同三  
司尚書左僕射太子少師上柱國梁國公房玄齡器範  
忠肅識具明允才稱王佐望乃時英霸圖爰始預經綸  
之業鼎命惟新贊隆平之化誠固金石勲勒鐘鼎自任  
總庶尹職重朝端心力盡於翼亮憂勞積於歲序而志

在冲退有懷止足固陳哀疴屢上表疏然則燮於禮閣  
職務實繁論道槐庭望實攸屬宜加寵命平茲水土可

司空

貞觀十六  
年七月

狄仁傑內史制

鸞臺贊謀帷幄秉鈞之任為重典綜絲綸揮翰之才是  
屬銀青光祿大夫守納言上柱國汝陽縣開國男狄仁  
傑地華簪組材標棟幹城府凝深宮牆峻邈有八龍之  
藝術兼三冬之文史雅達政方早膺朝寄出移節傳播



良守之風入踐臺閣得名臣之體豈惟懷道佐明見期  
於管樂故以竭誠匡主思致於堯舜九重肅侍則深陳  
可否百辟在庭則顯言得失雖從容顧問禮被於皇闈  
而斟酌輕重事隆於紫誥宜遷掌閫之秩式懋專車之  
寵可守內史散官勲封如故主者施行

聖歷三年十  
二月十八日

### 韋嗣立平章事制

鸞臺鳳池清切鸞渚便繁諷納兩闈允資一德中散大  
夫守天官侍郎韋嗣立當朝人望奕代相門道周性全

才高識遠誠以待物寬而容衆往自綸翰五字見推洎處提衡九流式序懷宗廟之掌有社稷之能宜竭忠賢翊宣化政可守鳳閣侍郎同鳳閣鸞臺平章事散官如故主者施行

崔日用參知機務制

蘓頲

門下才為於時以宣可大之業精貫於日以定非常之勛古稱王佐今乃人傑大中大夫守兵部侍郎兼知雍州長史脩文館學士騎都尉安平縣開國子崔日用果

行育德脩辭立誠孝則揚親忠於事主堂堂乎貌暢君子之風諤諤其言蘊大臣之節故能書讀萬卷文窮四始高步登朝平心待物日者醜孽未殄嘉謀潛斷臨危不顧見義而作是用底績實所繫賴師兵戢矣京兆晏如宜緝台階之政式拜掖垣之寵可銀青光祿大夫行黃門侍郎參知機務學士勳封如故主者施行

唐隆元年七月

四日

### 姚元之同三品制

門下王佐之重師兵之任旁求棟幹膺此具瞻同州刺  
史姚元之宏畧冠時偉才生代識精鑒遠正詞強學有  
忠臣之操得賢相之風累踐台衡匡益斯在頃居藩郡  
循良是屬載懷一德分命六官訏謨允歸文武兼濟式  
憑帷幄之筭宜副韜鈴之委可兵部尚書同中書門下

三品

先天二年六月

張說檢校中書令制

門下殷命百工傳膺審象漢推三傑良屬運籌不有斯

人孰賚予弼尚書左丞張說居正合道體直理精朕昔  
在承華首延博望談經之際欽若讜言撫翰之間潤色  
鴻業屢陳匡益見嫉奸回頃雖抗跡踈遠而載懷飢渴  
今羣克已服大猷伊始永言亮采光朕側席之期俾茲  
啟沃成朕濟川之望宜登鼎鉉式綜絲綸可檢校中書

令先天二年七月

劉幽求知軍國大事制

蘓頔

門下尚書佐理四方取則端揆成務百工是師非允具

瞻孰康庶績封州流人劉幽求風雲玄感川嶽粹靈學  
綜九流文窮三變義以臨事精能貫日忠以成謀用若  
投水茂勲立艱難之際嘉話盈啟沃之初存謙直以不  
顧為奸邪之所忌萌釁頗露僭端竊發元宰見逐讒人  
孔多既斥羣克方宣大化期問政於經始載登賢於夢  
卜可依舊金紫光祿大夫尚書左僕射知軍國大事監  
脩國史上柱國徐國公仍依舊還實封主者施行

先天二年

八月  
一日

劉幽求同三品制

蘓頌

門下弼諧庶政亮采有邦不遇人傑孰膺王佐金紫光  
祿大夫守尚書左僕射知軍國大事監脩國史上柱國  
徐國公劉幽求緯量天假宏才代出子產之道四既取  
諸身臯陶之德九以成其用伊昔構屯感情謀始洎於  
開泰防萌覺初景化俟其丹青讒詞淆於白黑頃居炎  
瘴受矜之封莫聞重踐台衡從政之言益啟睠茲密勿  
方總訏謨宜兼委於掖垣仍具瞻於禮闈可同中書門

下三品餘如故主者施行

先天二年九月八日

### 張說中書令制

門下咸有其德委廊廟之元宰知無不為歸掖垣之成  
務銀青光祿大夫檢校中書令上柱國燕國公張說含  
弘育粹特表人師懸解精通見期王佐立言布文武之  
用定策勵忠公之典才冠代而不有功至大而若虛自  
頃弘益時政發揮王道萬事必理一心從乂以觀其獨  
伯起慎於四知嘗得其真叔敖謹於三省故能深而不



竭久而彌芳宣大號於紫宸潤昌圖於清禁我憑柱石  
爾作鹽梅正名之謂羣識斯集可守中書令散官勳封  
如故

先天二年九月十一日

姚崇兼紫微令制

蘓頲

黃門天之紫微地在清禁宰臣為重庶政攸先不有殊  
才曷云兼寄金紫光祿大夫兵部尚書同紫微黃門三  
品監脩國史上柱國梁國公姚崇河山粹氣禮樂清英  
德量在寬公心益謹詞必體要行之自遠學以窮微志

於可大允茲忠讜光我謀暮聞善若警欲仁斯至衣冠  
以為著蔡廊廟資其柱石朕之欽者管樂人之傑者蕭  
張遂能以身許國開物成務邦是用乂朝惟得賢北辰  
環拱四垣近密俾因題劍之榮式演如絲之命可兼紫

微令餘如故主者施行

開元元年十  
二月九日

盧懷慎平章事制

門下宰輔之任謨猷是屬不有大才孰康景化黃門侍  
郎盧懷慎貞良敦朴孝悌仁厚度量深於江海堅清邁

於冰雪事皆體大詎觀非聖之書心必在公雅契惟賢  
之典故能危言正色直道匪躬比之微管而求得說宜  
寵瑣闈參乎毘坐可同紫微黃門平章事

開元元年  
十二月

### 盧懷慎檢校黃門監制

黃門古稱納言亦號常伯厥命惟允朕之股肱俾乂成  
績聿歸良輔銀青光祿大夫行黃門侍郎同紫微黃門  
平章事上柱國漁陽伯開國伯盧懷慎氣資溫厚生於  
薊北年始英妙出自山東王佐所期人師見屬考彼揚

歷多所獻替學以充其忠讜才以運其清明所謂許國  
忘身立朝正色有仲山甫之節成管夷吾之能故其道  
彌高其心益下可以敷我王度弼於朕躬用增華於侍  
帷宜拜寵於參乘可檢校黃門監散官黃門如故主者  
施行

開元三年正月十九日

源乾曜平章事制

門下軒夢三相舜舉八元必佇人傑以宣邦政尚書左  
丞上柱國安陽縣開國男源乾曜博文強學達識周才

貞白可以勵時道義可以弘物虛懷同於抱月懸鏡不  
疲利器比於成風刺鐘無滯固可光左曹之駁議翊中禁  
之謀猷用參金鉉之司兼踐玉壺之副可黃門侍郎紫  
微黃門平章事勲封如故

開元四年十一月

宋璟兼黃門監蘇頲平章事制

黃門虞廷稱盛任以夔龍周邦以寧屬於閔散是知出  
納惟允必俟英竒啟沃以光寶資茂彥銀青光祿大夫  
守刑部尚書上柱國廣平郡開國公宋璟字量凝峻執

心勁直銀青光祿大夫行紫微侍郎兼知制誥上柱國  
許公蘇頲風檢詳密藻思清華或掌獻南宮持平邦典  
或揮翰西掖匡輔政途咸竭奉上之心俱盡匪躬之節  
九流俟其澄序衆務資其弼諧宜委銓官兼侍帷幄環  
可守吏部尚書兼黃門監頲可同紫微黃門平章事散  
官勲封並各如故

開元四年  
閏十二月

### 張說同三品制

門下乾坤以陰陽化成后王以輔弼興理所以寅亮天

極緝熙帝圖匪賴大賢孰寄斯任天平軍節度大使右  
羽林將軍兼并州長史攝御史大夫燕國公兼脩國史  
張說挺其公才生我王國體文武之道則出將入相盡  
忠貞之節則前疑後承諒可以弘此大猷總其邦政允  
釐庶績保乂皇家可守兵部尚書同中書門下三品勳  
封修國史如故即馳驛赴京

開元九年九月

### 張說兼中書令制

中書政本實管王言咨爾夏部僉曰惟允兵部尚書同

中書門下三品燕國公張說道合忠孝文武典禮當朝  
師表一代詞宗有公輔之材懷大臣之節儲宮侍講早  
申翼贊台座訐謨備陳匡益入則式是百辟出則敷政  
四方嘉績簡於朕心茂功著於王室賚予良弼光輔中  
興乃眷專車是稱樞密宜兼出納之任式副具瞻之舉

可兼中書令

開元十一年二月

唐大詔令集卷四十四